

Edric Burleson tambe a caba Grupo 3 di Formacion Social

Mi a siña cu traha den ekipo y cu disciplina ta yuda bo aki'den y tambe den bida



ORANJESTAD (AAN): Como un di e cinco hobennan cu a completa recientemente su trayecto di Formacion Social, Edric Burleson ta e persona indica pa papia di e efecto grandi cu e programa di entrenamiento y educacion por haci den bida di hobennan cu buscando un direccion nobo. Cu 22 aña el a tuma e decision di duna su mes un di dos oportunidad pa bay dilanti dor di siña un ofishi y cambia su pensamiento pa uno mas provechoso p'e mes y su famia.

Awo cu su 23 aña, e hoben cu ta bin di barrio di Calabasa cu e tin tur loke e mester pa prospera y cu e ta cuminsa dor di tur dia lanta

tempran. E ta consciente cu pa hopi, entrenamiento militar cu nan ta haya pa cuater luna na Marinierskazerne na Savaneta, por ta basta pisa.

Varios di su compañeronan cu a cuminsa den grupo 3 na januari 2013, a cay afo sea dor di esaki of otro circunstancianan. Sin embargo e ta kere cu e secreto di e exito ta sinta den traha hunto. Edric ta conta: "Si tur hende bira un team, e ta mas facil." Otro factor ta e boluntad cu bo tin pa deshaci di e custumbenan bieu y cu un mente habri adapta na e disciplina nobo cu bo ta wordo siña. No ta facil pa bay di un bida di

comodidad caminda bo ta dicidi ki ora y con cosnan ta wordo haci, pa pasa pa un sistema caminda tur cos ta stipula dor di superiornan y bo mester obedece constantemente. Apesar di esey, Edric sa bon cu esaki ta djis un di e lesnan cu lo sirbi'e pa resto di su bida. "Loke a haci e diferencia ta disciplina. Esey ta loke bo mester tin semper," e hoben a expresa.

Burleson a conta con durante e experiencia na Marinierskazerne nan a haci hopi ehersicio. Tambe el a corda con nan a bay campa den mondi pa basta dia y otro biaha a entrena den lama dor di bolter e boto cu nan ta riba dje pa despues bir'e y subi bek. E otro parti di Formacion Social ta esun caminda e hobennan aki ta bay bek scol durante ocho luna pa siña un ofishi. "Enseñanza pa Empleo ta pone bo up to date, pa bo haya e conocimiento bek di scol. E ta bale la pena". Nos a haya diferente vak manera wiskunde y computerles, pero tambe guia di Pastor y motivacion. E ultimonan aki, segun Edric "a muestra nos con nos por bay hopi dilanti."

Su plannan pa futuro ta

manera un canvas blanco cu e por bay crea un miho destino. Loke si e tin sigurta cu tur dia di awo padilanti, e ta lanta tempran mescos el a siña na kazerne. E proyecto di Formacion Social a inclui tambe un parti di stage, cual Edric a haci den e partamento di Maintenance na hotel Costa Linda. Aki tambe su experiencia tabata bon.

Formacion Social ta un programa andando for di 2012 na momento cu Gabinete Mike Eman I a

cera acuerdo di cooperacion cu Ministerio di Defensa na Hulanda riba iniciativa di Prome Minister di Aruba. Haciendo uso di facilidad y personal di Marinierskazerne, Arumil, pero tambe di Enseñansa pa Empleo, lidernan spiritual y di motivacion y cu asistencia di sector comercial, ta brinda hobennan sin diploma y sin trabou, un di dos oportunidad pa haci di nan bida uno di probecho y cu un futuro mas prometedor.